

III EDICIÓN DO PREMIO LINGUA E EMPRESA DO CONCELLO DE AMES

BASES

Primeira. Obxectivos

A convocatoria do Premio Lingua e Empresa do Concello de Ames ten como finalidade promover o uso da lingua galega na actividade económica do Concello de Ames, concretamente na actividade empresarial, e recoñecer publicamente a contribución ao aumento e mellora do uso social do galego desde este sector.

Segunda. Destinatarios/as

Poderán optar a este premio as empresas que teñan a súa sede social ou un centro de actividade no Concello de Ames.

Terceira. Méritos que se valoran

Valorarase o uso da lingua galega na actividade empresarial en todo o que teña que ver coa comunicación externa ou relacional e coa interna ou de xestión.

En concreto, terase en conta o seguinte:

A. Comunicación externa ou relacional

- Páxina web da empresa, se a tivese.
- Redes sociais da empresa, se as tivese
- Sinalética e comunicación do establecemento empresarial
- Campañas publicitarias ou materiais promocionais en calquera soporte
- Uso habitual do galego nas súas actividades e nos seus servizos
- Atención á clientela e ao público en xeral
- Calquera outro mérito que a empresa queira salientar

B. Comunicación interna ou de xestión

- Comunicación interna co persoal ou entre os diferentes departamentos, se os houberse.
- Existencia de normas de usos lingüísticos que fomenten o uso do galego e a diversidade lingüística.
- Calquera outro mérito que a empresa queira salientar

Tamén se terá en conta o impacto que a actividade empresarial poida ter en sectores especialmente relevantes para o proceso de normalización lingüística.

Para a comprobación destes méritos, as empresas candidatas deberán indicar os enlaces de

información correspondente ou achegar materiais impresos. Ademais, facilitaranlle ao Concello de Ames toda a información que se lles requira sobre os usos lingüísticos na súa comunicación externa ou interna ou sobre a veracidade dos datos achegados na candidatura.

Cuarta. Premio e categorías

O premio Lingua e Empresa do Concello de Ames terá unha dotación económica de **3.000 €**, 1.500 € en cada unha das categorías, ademais dunha **campaña de difusión** das empresas gañadoras na Radio Municipal de Ames. Se o xurado o considera oportuno, os premios poderán outorgarse *ex aequo*.

O premio divídese en dúas categorías:

A. Uso consolidado da lingua: empresas que veñen realizando un uso estable e continuado da lingua galega desde hai máis de dous anos.

B. Nova incorporación ou creación: empresas que se crearon nos últimos dous anos ou que incorporan o galego dentro dese mesmo período.

A resolución do premio publicarase o **30 de novembro de 2020** na páxina web municipal.

As empresas premiadas poderán mencionar na súa comunicación a obtención desta distinción e mesmo incluíla na súa publicidade ou papelería.

Para poder optar ao premio, as empresas premiadas deberán estar ao corrente nas obrigas tributarias coa Seguridade Social e co Concello de Ames.

Quinta. Prazo e forma de presentación de candidaturas

O prazo de presentación de candidaturas comezará o día seguinte da publicación desta convocatoria no Boletín Oficial da Provincia e rematará o **16 de novembro de 2020**.

As empresas poderán presentar directamente a súa candidatura ou seren propostas por calquera persoa ou entidade, xustificando, na medida do posible, os méritos cos que contén.

As candidaturas presentaranse de xeito telemático a través da sede electrónica do Concello de Ames (sede.concellodeames.gal). Tamén se poderán presentar de forma presencial ou por calquera das formas previstas na lexislación, **cubrindo unha instancia xeral e achegando o modelo-ficha habilitado para este efecto** (poderá descargarse da web municipal).

Lugares de presentación de xeito presencial no Concello de Ames:

-Oficina de Rexistro Xeral en Bertamiráns (Praza do Concello, num 2)

-Oficina de rexistro auxiliar do Milladoiro (Rúa de Abaixo, nº 10)

Horario de presentación presencial: das 9.00 ás 14.00 h, de luns a venres, **con cita previa**.

As empresas candidatas á obtención do premio, para manter esta condición, deberán acceder a facilitarlle ao Concello de Ames toda a información que se lles requira acerca dos usos lingüísticos na súa comunicación interna e externa.

Sexta. Xurado

O xurado será nomeado polo alcaldía do Concello de Ames e a súa decisión será inapelable

Sétima. Publicidade

Estas bases publicaranse no Boletín Oficial da Provincia da Coruña, mediante o extracto remitido pola Base de Datos Nacional de Subvencións (BDNS) e na páxina web municipal do Concello de Ames.

Todas as publicacións posteriores á publicación destas bases faranse na páxina web municipal.

Oitava. Aceptación das bases e autorización en canto á protección de datos

A presentación de candidatura ao premio por parte de empresas, empresas que teñan a súa sede social ou un centro de actividade no Concello de Ames, implica a aceptación total destas bases.

As empresas participantes na convocatoria, ao presentaren directamente a súa candidatura ou ao aceptaren a presentación por parte de terceiros/as, autorizan expresamente ao Concello de Ames ao uso da imaxe e dos datos achegados para os efectos de publicidade deste premio.

De conformidade co Regulamento xeral de protección de datos 2016/679 do Parlamento Europeo, do 27 de abril de 2016, e da Lei orgánica 3/2018, do 5 de decembro, de protección de datos persoais e garantía dos dereitos dixitais, os datos persoais obtidos serán incorporados a un ficheiro responsabilidade do Concello de Ames cuxa finalidade é a xestión do presente premio. Poderanse exercer os dereitos de acceso, rectificación, limitación do tratamento ou calquera outro establecido na normativa vixente mediante un escrito dirixido ao Concello de Ames.

INFORMACIÓN:

Servizo de Normalización Lingüística

normalizacion@concellodeames.gal / 662 377 215

Departamento de Promoción Económica

promocioneconomica@concellodeames.gal 981 883 002 (ext. 2114)